

Dragi prijatelji/ce,

Predstavljamo vam **januarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **180** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:



<http://www.omladina-bih.net>

S A D R Ž A J

Aktivnosti u januaru 2016.	2
Planovi za februar 2016.	5
Aktivnosti članova mreže	6
Mladi pišu - kolumna	16
Informacije / donatori / pozivi.. ..	18

AKTIVNOSTI ORC / HCA U JANUARU 2016.



Anna Lindh Fondacija Bosanskohercegovačka mreža

Projekat „Vašar kulture“

ALF je u okviru javnog poziva „Interkulturalne akcije mreža“ u BiH podržala projekat „Vašar kulture“ aplikanta DIS Pozorište mladih Banja Luka, sa partnerima Udruga Enter Vitez, Proni Brčko, Prosvjeta Višegrad i ORC Tuzla.

U skladu sa definisanim ciljevima dogovorili smo konkretne korake i akcije koje su realizovane tokom prvog događaja održanog u Vitezu u periodu 19.-22. novembra, uz učešće oko 30 predstavnika svih projektnih partnera, predstavnika nekoliko drugih članica ALF mreže, ali i NGO-a koji nisu članovi mreže ALF, a izrazili su želju da učestvuju na jednom ovakvom događaju. Tokom 4 dana održane su tematske radionice sa ciljem jačanja kapaciteta mladih za interkulturalne kompetencije, uz isticanje važnosti neformalnog obrazovanja u sticanju novih znanja. Pored edukativnih programa tokom događaja su pored ostalih upriličene i teatarske izvedbe: **Maske** – forum teatar, (vršnjačko nasilje), **Lilika** – (otuđenost mladih i raspad porodice), **Portret maligne ćelije** – (problemi obolelih od najtežih bolesti), koje su svojim tematikama bile usklađene sa prezentovanim u edukativnim programima.



Nakon održanog prvog događaja projektni partneri su nastavili sa stalnim kontaktima u cilju što bolje pripreme glavnog događaja koji se planira za kraj marta mjeseca 2016. godine u Banja Luci. S tim u vezi je u Banja Luci tokom vikenda 16.-17. januara 2016. godine održan konsultativni sastanak projektnih partnera, na kojem su analizirani rezultati provedenih aktivnosti u Vitezu. Tom prilikom je dogovoreno i da svaki od projektnih partnera predloži jednu od tema za završni događaj, a konačna lista i teme radionica kao i pozorišnog i filmskog programa će biti usaglašena putem bilateralnih i multilateralnih kontakata projektnih partnera.

Okupljanje više teatarskih grupa upravo u ovom terminu je imalo još jednu dodatnu vrijednost, a to je da su učesnici svojim predstavama obilježili i Evropsku noć pozorišta/kazališta/teatra.

Prezentacija programa „Evropa za građane“

26. januara 2016. godine se u Tuzli održala prezentacija programa „Evropa za građane“. Prezentacija je upriličena u Domu penzionera, u organizaciji Ministarstva pravde BiH, Udruženja potrošača TK.

Prezentaciju je vodio gospodin Goran Kučera, stručni savjetnik za razvoj civilnog društva pri Ministarstvu pravde BiH. Gospodin Kučera je do u detalje iznio niz mogućnosti koje se nude organizacijama civilnog društva iz BiH puta programa „Evropa za Građane“, koji se sastoji od nekoliko dijelova: „Evropa u sjećanju“, „Demokratski angažman“, kao i projekti civilnog društva.

Prezentacija je uspjela da jasno objasni učesnicima šta je to program „Evropa za građane“, koje su to procedure apliciranja, koja sredstva su obezbijedena za 2016. godinu. Takođe je detaljno objašnjena projektna aplikacija, kao i procesi odabira i selekcije projekata od strane Evropske komisije. Na prezentaciji je bilo oko 20 učesnika, ORC Tuzla su predstavljali Merita Sokoli i Boško Vlajić.

OSCE konferencija za mlade

29. 01. 2016. godine održana je konferencija za mlade u organizaciji Savjetodavne grupe za mlade OSCE misije u Bosni i Hercegovini.

Konferencija je održana u prostorijama OSCE misije u Tuzli. Cilj konferencije bio je umrežavanje (networking) omladinskih NVO sa područja Bosne i Hercegovine.

Na konferenciji se govorilo o konkretnim stvarima koje svaka NVO može staviti na raspolaganje drugim učesnicima konferencije kao što je: prostor, ljudske resurse, savjetodavne usluge i podrška u pisanju projektnih prijedloga.



Jedan od učesnika ove konferencije bio je i član Omladinske grupe Omladinskog resursnog centra Tuzla, Suad Murselović.

Omladinska grupa ORC Tuzla:

AKTIVNOSTI GRUPE U JANUARU

Kao i prethodne dvije godine, Omladinska grupa ORC-a Tuzla je u januaru svoje aktivnosti svela na minimum – što zbog svih praznika, ali i zbog studenata koji se marljivo spremaju za ispitne rokove.

U toku mjeseca januara održan je jedan sastanak grupe na kojem su članovi upoznati sa projektom „Fudbal za sve“, finansijski podržanim od strane Fondacije „Fudbalom protiv homofobije“. Realizacija projekta je planirana u mjesecu februaru i martu.

Za naredni mjesec planirana je izrada videa u okviru turnira „Fudbal za sve“, te online akcija.

► EUROACTIVE – ČOKA

Projekat „EuroActive“ organizovan je od strane Srbijanske NVO „Čokanski dobošari“, i biće realiziran u dvije faze (TC-Trening kampa). Prvi trening kamp održan je od 15. do 21. januara. Drugi trening kamp će biti održan od 21. do 28. maja.

Prve aktivnosti projekta tj. prvi trening kamp bio je posvećen načinima procjene socijalnih problema u lokalnoj zajednici, „mapiranju sukoba“, komuniciranju sa mladima i aktiviranju mladih i učenju osnovnih pozorišnih metoda u radu sa mladima.



Drugi trening kamp biće posvećen Forum teatru (Teatru Potlačenih), kao aktivacijskom alatu u radu sa mladima, što će omogućiti osnaživanje mladih na lokalnoj, regionalnoj, nacionalnoj i međunarodnoj razini.

Učesnici će obrađivati probleme odabrane na osnovu mišljenja javnog mnijenja pribavljenog po okončanju prve faze projekta, što će omogućiti da se pozabavimo stvarnim društvenim problemima sa kojima se mladi susreću u svojim lokalnim zajednicama (kao što su diskriminacija po različitim osnovama, nedostatak mogućnosti, nedostatak dijaloga s donositeljima odluka i drugim pitanjima), a sve to metodom Forum Teatra.

Ciljna grupa projekta su mladi iz Albanije, BiH, Bugarske, Hrvatske, Grčke, Italije, Makedonije, Portugala, Rumunije i Srbije. Predstavnik Omladinske grupe ORC Tuzla bio je Suad Murselović.

✚ PREDSTAVLJAMO MLADE!

Nastavljamo sa predstavljanjem mladih aktivista i volontera iz BiH.

ADMIR ISANOVIĆ

ADMIR Isanović je student Pravnog fakulteta i omladinski aktivista. Član je OGORC-a od marta 2015. godine.

Aktivno je učestvovao u nekoliko projekata i seminara sa grupom i time dao doprinos razvoju Omladinske grupe. U slobodno vrijeme voli čitati, gledati filmove.



ZADA BEŠIĆ

ADI SELMAN


Zada Bešić je studentica četvrte godine Fakulteta za tjelesni odgoj i sport u Tuzli. Aktivno se bavi sportom. U NVO ima dugogodišnje iskustvo. Učestvovala je na mnogobrojnim kampovima, seminarima, treninzima. Iskustvo u ORC-u joj je poslužilo da bude inicijator i koordinator na nekoliko projekata. Smatra da je sa OGORC-om uspjela da napravi savršen spoj aktivizma i sporta kroz projekte "Živi zdrav život" koji su postali tradicionalni projekti naše grupe

Adi Selman je student Fakulteta zdravstvenih nauka, smjer Fizioterapija i radna terapija. Član je Omladinske grupe Omladinskog resursnog centra godinu dana. Učesnik je mnogobrojnih projekata koje je organizovao ORC. Pored toga aktivno se bavi karateom. Adi je trener i takmičar u KBS Tuzla Sinbra.

REDOVNE AKTIVNOSTI ORC I HCA TUZLA:

Tokom januara smo radili na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

PLANOVI HCA/ORC-A ZA FEBRUAR 2016.

- Sprovođenje redovnih aktivnosti kroz Omladinsku mrežu BiH;
- Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu (organizovanje sastanka sa stejkholderima);
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Nastavak rada na namicanju sredstava za 2016. godinu.

AKTIVNOSTI ČLANICA OMLADINSKE MREŽE BIH



ASOCIJACIJA SREDNJOŠKOLACA U BOSNI I HERCEGOVINI

Adresa: Mula Mustafe Bašeskije br. 7, 71 000 Sarajevo

Tel/fax: 033 205 850

e-mail: asubih@yahoo.com

web: www.asubih.ba

+ SOS SELO

Članovi LT Sarajevo su posjetili SOS Dječije selo i odnijeli svoju donaciju u vidu paketića za djecu sela.

Upoznati su sa radom i funkcionisanjem SOS Dječijeg sela, te su dobili informaciju na koji način mogu da svojim volonterskim radom doprinesu razvitku i poboljšanju rada sela.



+ PROJEKT W



Internews je krenuo sa implementacijom projekta pod nazivom „Ograničavanje restrikcija na slobodu izražavanja u BiH“ ili kraće „Projekt W“, kao odgovor na pogoršanu situaciju u domenu slobode govora u Bosni i Hercegovini, posebno nakon usvajanja Zakona o javnom redu i miru u Republici Srpskoj.

Osnovni cilj ovog projekta jeste „podići svijest javnosti, kao i reakcije u zaštitu medijskih sloboda i slobode izražavanja, te razvijati sve obuhvatnu kampanju ljudskih prava na nivou cijele države.“

U sklopu toga održana je radionica digitalnog zagovaranja na kojoj je bio prisutan i član UO Faruk Gutić.

+ TEAM BUILDING I EDUKACIJA

"TB&Ed" je projekat koji implementira Lokalni tim Sarajevo u saradnji sa Lokalni timom Istočno Sarajevo Asocijacije srednjoškolaca u BiH u periodu od 19. do 23. januara 2016.

Riječ je o obuci na kojoj su učesnici imali priliku da uče o raznim temama kao što su lobiranje, zagovaranje, komunikacija, javni nastup i slično, ali i da budu dio motivacionih i team building radionica.

U projektu je učestvovalo 20 srednjoškolaca iz Istočnog Sarajeva i isto toliko srednjoškolaca iz Sarajeva koji su zajedno sa trenerima prolaziti kroz sve aktivnosti koje su planirane u sklopu projekta. Učesnici su bili smješteni u Hostel City Center u Sarajevu, a niz aktivnosti je realizovao u uredu Asocijacije srednjoškolaca u Bosni i Hercegovini.



WINTER MAGIC

Lokalni tim Visoko Asocijacije srednjoškolaca u BiH u saradnji sa lokanim timom Ilijaš Asocijacije srednjoškolaca u BiH organizovao je zimski kamp pod nazivom "Winter Magic" u periodu od 15. do 17.01. 2016. godine u planinarskom domu "Zbilju", Visoko.

Srednjoškolci iz BiH su imali priliku prisustvovati trodnevnom kampu na kojem su se obrađivale razne teme, a neke od njih su: diskriminacija i strateška komunikacija, lobiranje, fundraising, kao i prisustvovati zanimljivoj psihološkoj radionici.

Cilj projekta jeste podstaći mlade u BiH da izgrade sebe u društvu, kao i da napreduju u daljem radu i zalaganju u svojoj lokalnoj zajednici.



"WALK THIS WAY"

Zahvaljujući saradnji lokalnih timova ASuBiH iz Jablanice, Prozor-Rame i Gornjeg Vakufa - Uskoplja uspješno je realizovan četverodnevni zimski kamp na Jablaničkom jezeru. Učesnici su kroz radionice imali priliku razvijati vještine komunikacije, govoriti o x faktoru za lakši pronalazak posla, a organizovane su i debate.

Dvadeset mladih iz Bihaća, Busovače, Kiseljaka, Modriče, Breze, Goražda, Mostara, Visokog, Sarajeva, Bugojna, Prozora, Gornjeg Vakufa i Jablanice družili su se u kampu u Ostrošcu. Januar koji je za srednjoškolce početak raspusta ili početak nove godine, za učesnike kampa „Walk this way“ početak je novih prijateljstava.



Upoznali su se s važnim historijskim momentima, a o trenutnom položaju mladih u Jablanici razgovarali su sa članovima Omladinskog kluba "Pod Istim suncem". I naravno, pored svega, uživali u snježnoj zimskoj idili pored prelijepog Jablaničkog jezera.

"BUĐENJE"

LT Stolac je održao akciju pod nazivom "Buđenje" u svrhu pomoći Domu za zdravstveno i socijalno zbrinjavanje osoba sa invaliditetom i drugih osoba. Akcija se sastojala u kupovini namjernica i higijenskih potrepština koje su odnesene šticienicima Doma.

Sponzori ovog projekta bili su lokalni kafići, prodavnice, te frizerski saloni. Nakon što su donijeli pakete, proveli su neko vrijeme sa ljudima koji su ih osvojili svojim humorom i pozitivnošću. Sa njima su se zaista lijepo proveli, a radnici Doma upoznali su ih sa problemima tih ljudi, njihovim potrebama, te načinom života.



U znak zahvalnosti dobili su i poklon od divnih ljudi, a to je crtež stećka, simbola Stoca, kojeg je nacrtao jedan od šticienika Doma.



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: kult@mladi.org

Tel.: 033 778 778; fax: 033 778 779

Web: www.mladi.org

MLADI POSTAJU BITNA KARIKA U REFORMAMA U BIH

Na reformskom putu koji je sada izvjesniji nego ikada, Bosnu i Hercegovinu čeka nekoliko teških godina prepunih izazova. Svi oni sadržani su u dokumentu Reformska agenda za Bosnu i Hercegovinu, čiji je predlagatelj Evropska unija. Povećanje poreza, akciza, smanjenje broja zaposlenih u javnom sektoru, strukturalne reforme u oblasti radnog zakonodavstva, jačanje fiskalnog sistema, reforma javne uprave, unapređenje poslovne klime i konkurentnosti, samo su neke od tačaka ovog dokumenta. Sve skupa, ispunjene, našoj bi zemlji trebale donijeti prosperitet. Naročito mladima, koji su, čini se, odlučili preuzeti stvari u svoje ruke.

Krajem prošle godine, u Sarajevu je formirano prvo Vijeće mladih FBiH koje je, tvrde njegovi članovi, krovna institucija za mlade u Federaciji BiH koja će zastupati interese svih mladih. Osnovna obaveza Federalnog vijeća mladih je djelovanje na jačanju uključenja mladih u društveni život zajednice i njihovom informisanju.

Vijeće će biti direktno uključeno u procese provođenja strategija prema mladima sa ciljem doprinošenja usvajanju i provođenju politike prema mladima i programa djelovanja za mlade koji najviše odgovaraju potrebama i pitanjima mladih, tvrdi Mate Lončar, predsjednik Vijeća mladih FBiH.



Formiranje Vijeća mladih predviđeno je Zakonom o mladima FBiH i od tada do danas, Institut za razvoj mladih KULT sa partnerskim organizacijama radio je na uspostavljanju održivih omladinskih struktura. „Od 2011. godine pomogli smo formiranju 46 općinskih i 6 kantonalnih vijeća mladih. Pružili smo im potrebno savjetovanje i mentorstvo. Danas je, preko ovih općinskih i kantonalnih vijeća, u rad Vijeća mladih FBiH direktno uključeno više od 2000 mladih iz Federacije BiH, što dokazuje njegovu demokratsku reprezentativnost“ – istakla je Abela Purivatra iz Instituta za razvoj mladih KULT.

U Bosni i Hercegovini 67,1% mladih je nezaposleno, a četiri od pet mladih iz ovih bi stopa napustilo svoju zemlju. Mate Lončar tvrdi da je Vijeće svjesno da je jedan od najvećih problema mladih nezaposlenost te dodaje da će se na rješavanju tog problema ozbiljno raditi.

Problem nezaposlenosti, obuhvatila je i Federalna strategija prema mladima čiji se nacrt uskoro trebao naći na stolovima federalnih parlamentaraca. Strategiju kreira Federalno ministarstvo kulture i sporta, a odlukom Vlade FBiH, Institut za razvoj mladih KULT imenovan je kao stručno-konsultativna podrška u tom procesu. Angažman mladih u ovoj godini, ako se zacrtani ciljevi ispune, pokazat će da mladi mogu biti ravnopravan partner vlastima u Bosni i Hercegovini i da je probleme mladih u zemlji moguće riješiti.

STRATEGIJA PREMA MLADIMA USKORO ĆE SE KREIRATI I U SARAJEVSKOM KANTONU

Položaj mladih u Kantonu Sarajevo može se i mora poboljšati. Svjesni su toga predstavnici vladinog ali i civilnog sektora. Zato je u prostorijama Ministarstva za obrazovanje, nauku i mlade Kantona Sarajevo održan sastanak kojem su prisustvovali gosp. Elvir Kazazović, ministar obrazovanja, nauke i mladih KS, Sifet Kukuruz, savjetnik ministra, te Lejla Lihovac, saradnica za pitanja mladih u ovom ministarstvu, te predstavnici Instituta za razvoj mladih KULT.

Na sastanku je načelno dogovorena saradnja u izradi Strategije prema mladima u ovom kantonu koja bi trebala biti završena do kraja ove godine.

Katarina Vučković i Belma Gijo, predstavnice Instituta za razvoj mladih KULT, upoznale su prisutne o dosadašnjim iskustvima i aktivnostima Instituta kada je u pitanju poboljšanje položaja mladih. Predloženo je nekoliko modela izrade strategije, a načelno je dogovorena i saradnja na drugim poljima koja će voditi poboljšanju položaja mladih u Kantonu Sarajevo.



Elvir Kazazović, ministar obrazovanja, nauke i mladih KS, istakao je da je svjestan važnosti strateškog pristupa mladima. Kazao je da je Ministarstvo spremno sarađivati i sa Institutom ali i sa mladima kako bi dokument koji će obuhvatiti probleme mladih i ponuditi rješenja, bio što prije izrađen i što je još važnije, istakao je, što prije primijenjen.

MLADI ZASTUPNICI U SKUPŠTINI KANTONA SARAJEVO POSJETILI INSTITUT ZA RAZVOJ MLADIH KULT

Institut za razvoj mladih KULT sredinom januara posjetili su Mario Vukasović i Neira Avdibegović, zastupnici u Skupštini Kantona Sarajevo. U sklopu posjete Institutu saznali su više o inicijativama Instituta za rješavanje pitanja nezaposlenosti mladih, zatim političkog učešća mladih, obučavanja službenika za pitanja mladih i stručnih saradnika za rad s mladima, kao i na drugim inicijativama za poboljšanje cjelokupnog položaja mladih kroz donošenje strateških rješenja, te saradnje s vlastima na svim nivoima.



Tokom ove radne posjete bilo je riječi o mogućnostima za saradnju u procesima koji su trenutno aktivni u Kantonu, gdje su gosti s predstavnicama Instituta razmijenili ideje, te istakli važnost rada parlamentaraca na principu „otvorenih vrata“ kako bi osluškivali potrebe građana i kako bi im približili svoj rad.

Na sastanku se razgovaralo i o donošenju strateških i zakonskih rješenja za mlade koji nedostaju u Kantonu Sarajevo kako bi svi mladi u BiH imali jednake mogućnosti, te kako bi se konkretizirala politika prema mladima u ovom kantonu.

Mario Vukasović, zastupnik u Skupštini KS, pokazao je veliki interes za aktivnosti koje provodi Institut i podcrtao važnost zajedničkog djelovanja vladinog i nevladinog sektora u ovoj oblasti: „Prvenstveni fokus mog djelovanja jeste oblast obrazovanja i problemi mladih u našoj državi, ali isto tako sam spreman raditi i sarađivati na svim drugim pitanjima od značaja za građane kantona. Mišljenja sam da se Institut pokazao kao

pouzdan partner izvršnoj i zakonodavnoj vlasti u procesima poboljšanja položaja mladih i iskreno se nadam da ćemo ostvariti saradnju kroz konkretne aktivnosti“ .

Uskoro će ovi mladi zastupnici posjetiti Obrazovno-raznodni centar za mlade SPAJALICA gdje će razgovarati sa mladima. Njihove potrebe, tvrde Vukasović i Avdibegović, obuhvatit će zastupničkim pitanjima koja će se uskoro naći pred ostalim zastupnicima u Skupštini Kantona Sarajevo.

✚ NARANDŽASTI DAN OBILJEŽEN U NARODNOM POZORIŠTU U SARAJEVU, NA PREMIJERI KRLEŽINE „HRVATSKE RAPSODIJE“

Svaki 25. u mjesecu obilježava se kao Narandžasti dan – dan borbe protiv nasilja nad ženama i djevojčicama. Institut za razvoj mladih KULT, uz podršku Ambasade SAD-a u BiH, ovaj 25. Obilježio je u Narodnom pozorištu u Sarajevu, na premijeri predstave „Hrvatska Rapsodija“ Miroslava Krleže. Ova predstava, pod redateljskom palicom Gradimira Gojera, govori u suštini o brojnim anomalijama jednoga društva. Nakon predstave, aktivisti Instituta za razvoj mladih KULT o ovom problemu razgovarali su sa prisutnima, dijelili kolačiće sa porukama protiv nasilja napravljene u Dream Cookies radionici Mehire Crnica, a u NPS bila je postavljena i izložba akademske slikarice Emine Kujundžić.



Svaka peta žena u Bosni i Hercegovini tokom svog života, proživjela je neki oblik nasilja. Prema podacima Agencije za ravnopravnost polova 52,8% žena je od svoje petnaeste godine pretrpjelo neki oblik nasilja. Osim fizičkog i psihičkog nasilja, u Bosni i Hercegovini žene su u nepovoljnom položaju i na drugim poljima, tvrdi Mirela Ajanović iz Instituta za razvoj mladih KULT. U Bosni i Hercegovini postoji devet sigurnih kuća i SOS telefonske linije koje su besplatne i povjerljive. Obilježavanjem Narandžastog dana želimo ohrabriti žene da ne šute o problemima, a bh. društvu poručiti da problem postoji i da se o njemu mora govoriti.

„Protekli mjesec Narandžasti dan obilježili smo na ulicama grada Sarajeva, ovaj smo odlučili obilježiti u Pozorištu. U suštini, želimo doprijeti do svih slojeva bh. društva. Želimo ohrabriti žene da potraže pomoć. Posebnu snagu našoj inicijativi daje činjenica da se istoga dana i na isti simboličan način, kampanja protiv nasilja provodi u cijelome svijetu, zahvaljujući Global UNiTE omladinskoj mreži, čija je Institut članica. Institut za razvoj mladih KULT o problemu nasilja nad ženama i djevojčicama govorit će svakoga dana. Narednih mjeseci na Narandžasti dan radit ćemo kampanje slične ovoj jer nijedna žena ne smije biti žrtva nasilja“ – zaključila je Mirela Ajanović.

Generalni sekretar UN-a proglasio je svaki 25. u mjesecu "Narandžastim danom" (Orange Day), kao dan podsjećanja na važnost prevencije, sprečavanja i sankcionisanja nasilja nad ženama i djevojčicama.



OMLADINSKA ORGANIZACIJA "SVITAC"

Jusufa Čampare bb, 76 100 Brčko Distrikt

Tel./Fax: 049 211 032

Email: svitac@teol.net

Web: www.svitac.org

FB: www.facebook.com/omladinska.svitac

DNEVNE RADIONICE

Omladinska organizacija Svitac je u januaru (nakon praznika) nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim radnim danom od 11:00-13:00, a uzrast 8+ od 14:00-15:30 časova.

Grupa sa mališanima je ovog mjeseca pravila lava lampe koristeći ulje, šumeće tablete i boju za hranu, hvatače snova od žice i šarene vune, te crteže na temu moj grad sa akrilnim i vodenim bojama, koji su postavljeni u glavnom holu Omladinskog centra kao dio izložbe.

Učesnici dnevnih radionica su pravili origami čamce, srca kao košarice i poklon kutijice, te autoportrete koristeći flomastere i bojice.

Takođe, mala i velika grupa je svakog ponedjeljka učila osnove engleskog jezika koristeći radne listove za učenje prepoznavanja emocija, dijelova tijela i upoznavanje sa raznim vrstama životinja.

Velika grupa na engleskom je učila o razlikama gramatičkih tempora i kroz igru vježbala svakodnevni razgovor.

Učenje je i ovaj mjesec olakšano kroz pjevanje, mimiku i muziku. Cilj radionica je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U januaru je 30 učesnika pohađalo jutarnje kreativne radionice.

Poslijepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti (uzrast 8+). Ponedjeljkom je na rasporedu engleski jezik, alfabet, izgovor, i fleš kartice za ponavljanje vokabulara i sastavljanje rečenica.

Utorkom kreativno izražavanje na temu zima i zimske radosti, okviri za slike i kreativno izražavanje kroz crtanje i slikanje koristeći akrilne boje, flomastere, drvene bojice i kolaž papire. Srijedom je muzička radionica gdje učesnici imaju priliku da uče osnove sviranja na trubi, gitari ili klaviru i razvijaju sposobnosti komunikacije i dijaloga na temu ritam, note i razni pravci muzike.

Četvrtkom je sportski dan kada se organizuju razne vrste igara sa loptom, upoznavanja sa osnovama ragbija, karatea i dramske radionice. Grupa je podijeljena u dvije manje i učesnici imaju mogućnost da izaberu sport ili dramu. Petak je dan za učenje osnova njemačkog jezika kao i za pomaganje u izradi domaće zadaće.



Radionice se održavaju u Omladinskom centru Brčko distrikta. Koordinator radionica u januaru je bila Asja Subašić uz asistenciju lokalnih i Weltwaerts i EVS međunarodnih volontera Jonasa Kiesnera, Anne Bonitz i Johanne Weng iz Njemačke, te Isambarda Raynera iz Velike Britanije. Broj učesnika starije grupe je trenutno 20.



JEZIČKE RADIONICE

Kursevi engleskog i njemačkog jezika su nastavljani i u januaru. 35 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskog centra Brčko distrikta. Starost studenata je od 8 do 35 godina.


MUZIČKE RADIONICE

► Radionice sambe

Učesnici su nastavili sa sviranjem uvježbanih kompozicija, improvizacijom kao i učenjem notnih vrijednosti i čitanjem kraćih notnih zapisa.

Za februar se planira nastavak svih redovnih radionica Omladinske organizacije Svitac.





**ANESA HIDIĆ, član Omladinske mreže, pojedinac
OMLADINSKI KRUG KLADANJ
E-mail: anesahidic@hotmail.com**

+ VIJEĆE MLADIH OPĆINE KLADANJ SEMINAR O PRAVIMA MLADIH U STUPARIMA

Dana 28.12.2015. Vijeće mladih općine Kladanj u sklopu projekta "Seminar o pravima mladih" održalo je edukaciju za mlade u Osnovnoj školi u MZ Stupari.

Projekat je podržan od strane Općine Kladanj, prema Strategiji za mlade. Osim ovog projekta održana je prezentacija o problemu govora mržnje. Edukacije o ovoj temi održala je Ernada Avdibegović.



+ IZLOŽBA: "SAKRALNI OBJEKTI KLADANJSKE ČARŠIJE"

Izložba ili bolje rečeno, svjedoci bogate historije naše male čaršije je naziv izložbe koja je upriličena 29.12.2015. u holu Doma Kulture u Kladnju. Zadovoljstvo je prisustvovati svakom kulturnom događaju, a posebno kada je to u organizaciji naših profesora i učenika.

Zahvaljujemo profesorima Rifetu Rustemoviću i Beširović Nedžadzu kao i učenicima gimnazije u Kladnju, Taindžić Azri, Selimbašić Amini, Karamuratović Dini i Salihović Ajdinu.



Ovakvi događaji, posebno kada su "dirigovani" od strane mladih ljudi daju nadu da Kladanj ima budućnost. Na kraju, nije li i izložba pokazala da je u Kladnju uvijek bilo malih ljudi iza kojih su ostala velika djela.

+ NO HATE – LOKALNI TIM KLADANJ

No hate sekcija u okviru Omladinskog kruga Kladanj 04.01.2016. održala je svoju 17. po redu aktivnost koja radi na suzbijanju govora mržnje u društvu, a posebno među mladima. Aktivnost je bila usmjerena na prezentaciju "On line sigurnost na internetu" sa posebnim osvrtom na sigurnost žena i djevojaka. Pohvale za Šerifu Buševac i Aminu Mašić za odlične prezentacije. Koordinatorica aktivnosti je bila Ernada Avdibegović.

+ VIJEĆE MLADIH OPĆINE KLADANJ - SKUPŠTINA

Vijeće mladih općine Kladanj održalo je Seminar o pravima mladih i redovnu skupštinu na kojoj je birano novo rukovodstvo.

Izabran je novi predsjednik Ismar Šahmanović, a dosadašnja predsjednica Ernada Avdibegović je održala predavanje o Zakonu o mladima, pisanju projekata, i omladinskom aktivizmu te uručila certifikate o učešću mladima iz Kud-a Mladost, Omladinskog kruga Kladanj, te Civitasa.



HUMANITARNI RAD



Udruženje Humanost na djelu "Birra" Kladanj na svojoj redovnoj godišnjoj Skupštini objavilo je rezultate rada. Predsjednica Edita Ahmetpahić je istakla da je u humanitarne svrhe prethodne 4 godine je usmjeren 23.00 km.

Novčana sredstva su usmjerena na kupovni životnih namirnica, plaćanje stanarine, plaćanje školskih karata, pomoći pri liječenju najugroženijih kategorija stanovništva.

Udruženje broji 90 članova i ovim putem pozivamo sve građane da se učlane i članarinom doprinesu ovom humanitarnom fondu. Pohvale za transparentan rad. Na Skupštini je istaknuto da Udruženje nažalost nema još uvijek svoje stalne prostorije i da se radi na tome da se ovaj problem riješi.



LJUBICA MLAĐENOVIĆ

Referent za mlade

GRADSKA UPRAVA BIJELJINA

E-mail: ljubica.mladjenovic@gmail.com

U SUSRET PRAZNICIMA

Udruženje građana „Cool“ u saradnji sa Gradskom upravom Bijeljina i kompanijom „Steko“ odlučili su obradovati mališane grada Bijeljine uljepšavanjem gradskog parka. Akcija uljepšavanja grada za naše mališane sastojala se u izradi panoa na kojem su naslikani njihovi najdraži animirani likovi.

Ovom prilikom se zahvaljujemo Gradskoj upravi Bijeljina koja je nesebično donirala novac za ovu akciju našim mališanima, kompaniji „Steko“ koja je izvršila donaciju u vidu materijala i našim kreativnim i talentovanim mladima iz UG „Cool“ koji su se potrudili da naš park u toku prazničnih dana izgleda ljepše i interesantnije.



Tokom akcije naročito se je istakao talentovani i samouki umjetnik Danijel Vujanović koji je ujedno najavio još mnogo aktivnosti u toku narednih prazničnih dana!



H.O. Muslimansko dobrotvorno društvo – MERHAMET DOBOJ

Kralja Aleksandra 17, 74 000 Doboj

Tel./fax: 053 226 886

E-mail: merhamet.doboj@cutuk.net

Web: www.ngo.ba; www.facebook.com/Merhamet-Doboj

✚ AKTIVNOSTI H.O. „MERHAMETA“ DOBOJ ZA JANUAR 2016 GODINE

- Predstavnici Vijeća mladih Opštine Srebrenik (projektni tim) 15.01.2016 godine bili su u posjeti H.O. „Merhametu“ Doboj i Omladinskoj organizaciji „Šesto čulo“ Doboj. Tom prilikom razgovarano je o implementaciji zajedničkih projekata i izveden neočekivan, ali izvanredan performans Arijane Moranjkčić - voditeljice Plesne škole „Rebus“ Srebrenik.
- Raspodjela pčelarske opreme po projektu „Federalnog Ministarstva za raseljena i izbjegla lica“ BiH. Predsjednica „Merhameta“ Doboj, Avdić Faketa sklopila Ugovore sa korisnicima: Ismet Gredelj, Safeta Mahmutović, Edin Mahmutović i Suzana Ristić. Održana je i prezentacija za korisnike na kojoj je na veoma slikovit način objašnjeno sve vezano za bavljenje pčelarstvom.



- Podjela humanitarne pomoći za članove „Merhameta“ Doboj - 23.01.2016. godine.
- Predsjednica „Merhameta“ Doboj Avdić Faketa prisustvovala „Sajmu uspješnosti“ koji je organizovao Udruženje „Tolerancijom protiv različitosti „ ToPeer“ Doboj od 28. do 30. januara u velikoj sali Gradske skupštine Doboj.



KOLUMNA: Mladi pišu




Za Bilten piše:

Slobodan Blagovčanin

Koordinator Omladinske grupe ORC-a
slobodanblagovcanin@yahoo.com

+ ISPITOMANIJA; KAKO EFIKASNO UČITI - TIPS & TRICKS!

Dok lagano pjevušimo poznate Samardžićeve stihove „Zaustavite januar“ i kao pravi studenti postajemo sve svjesniji da je ispred nas strašni ispitni rok, praćen prazničnim i novogodišnjim žurkama, bezbrojnim reprizama i mamurnim dolascima na ispite, tu i tamo probudi se želja da se i položi neki ispit u predstojećem roku.



U moru silnih „tutorijala“ – *Kako lako i efikasno učiti / Kako položiti ispit sa što boljom ocjenom / Koraci za kampanje i slično* – ne možemo a da ne primjetimo da se u svim ovim „tutorijalima“ redovno nameće obavezno davanje rokova samima sebi, što uzoran student ne može i neće nikada ispuniti (što zbog nadolazećih prazničnih gida, što zbog „Izašla je nova sezona omiljene serije“ ili „Opet mi se gleda maraton Gospodara prstenova i Ratova zvijezda“). Kako god bilo, vrlo lako uviđamo da je postavljanje i poštovanje rokova vrlina koja se vježba od osnovnoškolskih klupa, a nikako na godinama studija.



Šta nam je onda činiti kako bismo našli sebi još jedan razlog više za opijanje u januaru? Iako nas najbliža studentska kafana uvijek ugosti; bilo da smo pali ili prošli ispit, moramo priznati da je čokanjčić kajsijevače sa studentske akcije od marku (cca 60 RSD) mnogo slađi kad se ispit položi.

Sad kad smo riješili dilemu pravih i uzornih studenata, koji zbog obaveza prema sebi i društvu ne mogu redovno da uče ili još gore, noć prije ispita uvijek „Guaranu“ iz friždera stope sa votkom (jer mnogo bolje se miješa nego sa „fontom 8“ knjige predstojećeg ispita iz studentske kopirnice), nameće nam se samo jedno rješenje:

Način je jednostavan! Kozmetičke proizvode pored wc šolje zamijenite skriptama koje ste mukom sakupljali na kafama, kahvama i kavama, te gidama i partijama kod svojih kolega u rane sate pred kolokvije!

Statistički gledano, prosječan BH student dnevno provodi 15 minuta u toaletu i gotovo svaki dan dva puta, što je sasvim dovoljno vrijeme za iščitavanje skripte i upoznavanja sa gradivom umjesto recimo učenja rumunskog jezika sa nove hidratantne kreme za lice ili bušenja rupica na novom pakovanju toaletnog papira. – Da i to radimo.

Tako da već danas iscimajte kolege sa starijih godina da vam ustupe svoje skripte. Neka realna cijena je jedno točeno pivo za odštampanu skriptu, ili častim kafom kad se vidimo ako je dobijate na msnger ili e-mail. (Naravno ova kafa je jedna od studentskih legendi i kažu da se jednom i popila u „Alti“. Nažalost, nije bilo svjedoka, a studenti koji su je pili upisali su master u Švedskoj i vjenčali se za papire.)

Sljedeći korak jeste raščistiti sve nepotrebne preparate na kojima ste do sada učili ugrofinske i romanske jezike, te skripte poredati redom na veš mašinu. Finalni korak: kad odete na toalet, udobno se zavalite i počnite sa iščitavanjem svojih skripti.

Metod uspijeva samo kod studenata koji svoje omiljene serije ne gledaju na tabletu, ako gledate na tabletu - za januar je najavljena šesta sezona „Downtown Abbey“ i vrlo vjerovatno da ćete se teško odlučiti za skriptu pored nove epizode.



INFORMACIJE / DONATORI /POZIVI

1. Robert Bosch Stiftung: finansiranje za projekte na područjima izgradnje mira i transformacije sukoba

Broj sukoba unutar zemalja, kao i sukoba među nacijama je u posljednjih nekoliko godina i dalje u porastu. Ovaj trend prati veći broj lokalnih, regionalnih i međunarodnih inicijativa transformacije sukoba. Stoga postoji velika potreba za ciljanom i pravovremenom podrškom.

Naš cilj je podržati projekte koji služe facilitiranju transformacije sukoba u sukobu (i prošlih sukoba) društava u različitim regijama. Kao rezultat toga podržavamo projekte koji se fokusiraju na suočavanje sa prošlosti, uključujući pitanja tranzicijske pravde, posredovanja, ljudska i manjinska prava, jedinstvenu ulogu digitalnih tehnologija u sukobima (i postkonfliktnim društvima), načine izvještavanja o sukobima, i ulogu religije u sukobima.

Posebno smo voljni podržati projekte koji omogućavaju prijenos dobre prakse iz jedne regije ili ciljanog u područja u drugo.

Prijave za finansiranje projekata do cca 25.000 eura primamo tokom čitave godine.

Link za više informacija:

<http://www.bosch-stiftung.de/content/language2/html/61514.asp>

2. Višegrad fond – Program standardnih grantova

Program standardnih grantova služi za podršku projektima srednje dužine trajanja (do 12 mjeseci), srednje razmjere (minimalan budžet je 6.001 euro).

Svaki predloženi prijedlog projekta za koji će biti odobrena podrška treba povezivati osobe ili institucije iz najmanje tri zemlje Višegradske regije (gdje organizacije iz zemalja iz naše regije također mogu aplicirati), te razvijati projektne aktivnosti na području kulture, nauke i istraživanja, obrazovanja, razmjene mladih, prekogranične saradnje (mogući su bi-/trilateralni projekti) i promocija turizma.

Projekti dobijaju finansiranje u dvije tranše i ukupan doprinos Fonda ne smije biti veći od 80%. Svake godine se u okviru ovoga fonda dodjeli 2.2 miliona eura sa rokovima prijave 15. ožujak/mart i 15.september/rujan.

Više informacija: <http://bit.ly/1ZvIMrl>

Izvor:

http://www.civilnodrustvo.ba/vijesti/visegrad_fond_program_standardnih_grantova.html

3. Grant – Nacionalna zaklada za demokratiju NED

Svake godine nacionalna zaklada za demokratiju podržava na stotine organizacija civilnog društva koje rade na unapređenju demokratskih ciljeva i jačanju demokratskih institucija. U 2012 godini NED je finansirao oko 1236

projekata u 92 zemlje širom svijeta. Iznosi grantova se razlikuju ovisno o veličini i opsegu projekta, a prosječna finansijska podrška traje oko 12 mjeseci i iznosi 50.000 \$.

NED finansira isključivo organizacije civilnog društva, što uključuje: organizacije, asocijacije, nezavisne medije i druge slične organizacije.

NED podstiče apliciranje organizacija koje rade u različitim okruženjima, uključujući novonastale demokratske sisteme, polu-autoritarnu zemlju i zemlju u demokratskoj tranziciji.

NED ne daje grantove pojedincima, vladinim institucijama, školama i univerzitetima.

Info: <http://bit.ly/1Qv3N4T>

Izvor:

http://www.civilnodrustvo.ba/vijesti/grant_nacionalna_zaklada_za_demokratiju_nedhtml

4. Javni poziv za podršku projektima prekogranične saradnje

Nacionalna agencija za regionalni razvoj **objavljuje** Javni poziv za podršku projektima prekogranične saradnje (CBC) kroz finansiranje učešća aplikanta/partnera.

Cilj programa je podrška institucijama i organizacijama iz Srbije pri apliciranju za programe prekogranične saradnje i samim time jačanje regionalne konkurentnosti kroz realizaciju zajedničkih projekata, kao i institucionalna održivost u kreiranju i realizaciji projekata.

Programi prekogranične saradnje su instrument Evropske unije za pružanje podrške saradnji institucija i organizacija u pograničnim oblastima susjednih država.

Programi prekogranične/teritorijalne saradnje predstavljaju finansijsku podršku saradnji navedenih područja na rješavanju pitanja od zajedničkog interesa. Ovakvi programi se sprovode od početka 90-ih godina, a od 2004. godine u programe teritorijalne saradnje se uključuju i države koje nisu članice EU, kada je u ovaj vid saradnje prvi put uključena i Republika Srbija. Sadašnji programi prekogranične i transnacionalne saradnje deo su finansijske perspektive 2014-2020. godine i imaju višestruki značaj, jer pomažu institucijama u Srbiji da se upoznaju i rade u skladu sa pravilima strukturnih fondova koja važe za zemlje članice EU.

Imajući u vidu sve veći značaj programa prekogranične/teritorijalne saradnje sa jedne strane, kao i rastući interes institucija i organizacija iz Srbije za uključivanjem u navedene programe sa druge strane, Nacionalna agencija je pripremila Program podrške projektima prekogranične saradnje u vidu sufinansiranja učešća (kontribucije) projektnih partnera iz Srbije. U pitanju je šest programa prekogranične saradnje iz finansijskog perioda (perspektive) 2014.-2020. godine, i to:

- Mađarska-Srbija;
- Rumunija-Srbija;
- Bugarska-Srbija;
- Hrvatska-Srbija;
- Srbija-Bosna i Hercegovina;
- Srbija-Crna Gora.

Kroz Program podrške NARR, moguće je aplicirati za sufinansiranje projekata koji bi bili podržani kroz gore navedene programe, otvorene u trenutku objavljivanja javnog poziva, kao i za one koji će biti otvoreni za vreme trajanja javnog poziva.

Pojedinačni iznos sufinansiranja-učešća NARR ne može biti veći od 10% vrijednosti udjela u projektu za svakog partnera-aplikanta iz Srbije.

Projekat treba da bude usmjeren ka postizanju posebnih ciljeva:

- jačanje konkurentnosti MSPP;
- kreiranje novih i očuvanje postojećih radnih mesta;
- unapređenje sposobnosti MSPP za pristup različitim izvorima finansiranja;
- unapređenje kvaliteta radne snage;
- podrška razvoju obrazovanja za preduzetništvo;
- unapređenje efikasnosti institucionalne podrške poslovanju i razvoju MSP i preduzetništva;
- optimizacija i unapređenje stepena iskorišćenosti postojeće i izgradnja nove poslovne infrastrukture;
- jačanje inovativnosti u MSPP;
- stimulisanje poslovnog udruživanja i kreiranja lanaca vrednosti;
- internacionalizacija poslovanja MSPP;
- podršku ženskom preduzetništvu, preduzetništvu mladih i socijalnom preduzetništvu;
- podrška ravnomjernom regionalnom razvoju;
- unapređivanje i jačanje saradnje sa institucijama susjednih zemalja, kako na centralnom tako i na lokalnom nivou;
- promocija važnosti pridruživanja EU za razvoj konkurentnosti MSPP;
- unapređivanje saradnje javnog i privatnog sektora na projektima.

Ukupan iznos raspoloživih sredstava: 45.000.000 dinara.

JAVNI POZIV JE OTVOREN DO UTROŠKA SREDSTAVA, ODNOSNO DO KRAJA KALENDARSKJE 2016.

Više informacija i konkursnu dokumentaciju potražite na adresi narr.gov.rs

Izvor: <http://socijalnoukljucivanje.gov.rs/rs/javni-poziv-za-podrsku-projektimaprekogranicne-saradnje-rok-31-12-2016/>

5. SHL poziv za podršku izbjeglicama

Posljednjih dana, sedmica i mjeseci nevjerovatne scene se odvijaju duž granica i željezničkih stanica izbjegličkih ruta u Jugoistočnoj Evropi.

Već više od dvadeset godina njemačka fondacija Schüler Helfen Leben (SHL) podržava nevladine organizacije u Jugoistočnoj Evropi koje su aktivne na području društvenog i rada sa mladima. Danas SHL najavljuje malu i nebirokratsku finansijsku podršku za slučajeve hitnosti u cilju podrške izbjeglicama u zemljama zapadnog Balkana.

Molimo vas da nam pošaljete kratki opis vaše ideje (maksimalno 1 stranica), odgovarajući budžet i kontakt podatke. Dobro došla je bilo koja vrsta podrške izbjeglicama u stanju potrebe, odnosno kupnja i distribucija vreća za spavanje, kišne jakne ili drugi predmeti, stambena podrška ili radionice na temu podizanja svijesti.

Pokušajte da budžet ne prelazi 2.000 eura kako bi se omogućilo više različitih vrsta podrške inicijativama, kao i na različitim mjestima.

Nema propisanog obrasca za prijave. Nema roka za prijavu. Izbor projekata će biti stalan dok god postoje raspoloživa sredstva.

Molimo vas da podijelite ove informacije sa drugim lokalnim nevladinim organizacijama i inicijativama. Ako vam treba više informacija o prijavi slobodno se obratite našim kolegama u berlinskom uredu:

Sandra Khusrawi ili Christian Braun
Stiftung Schüler Helfen Leben
Axel-Springer-Str. 40, D-10969 Berlin
T +49 30 30 83 16 90
F +49 30 30 83 16 99

Email: act-now@schueler-helfen-leben.de

www.schueler-helfen-leben.de

Napomena da je upite i prijave potrebno slati na engleskom jeziku.

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

WEB stranica Mreže:
www.omladina-bih.net

Mejling lista Mreže:
posta@omladina-bih.net

sCh design

Webmaster:
Emir Delalić-Zeko - Tuzla
emir.delalic@gmail.com

Adrese za slanje vaših informacija za mjesečni bilten:

Omladinski resursni centar Tuzla

Hadži Bakirbega Tuzlića 1,
75000 Tuzla
tel / fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje Omladinski resursni centar - ORC Tuzla
